



行萬里路

一生人，偲目珠看過个所有，毋會少，行過个路，乜算多，毋過有幾多使得留在若心肝肚？又有幾多所在，使得日夜在若腦膈肚蠕蠕動，錫著你心心念念還想愛過去一到？英國這個歐洲國家，斯有恁泥錫人个所在，短短幾日个時間，逐日都有新个事物，分人目珠擘大大，讚嘆這個國家、這個世界！在這位个每一日，新个接觸，帶分人新个體驗，看哪！單淨箍在柵欄肚該毋打眼个花花草草，斯有好分你頓腳歸點鐘，去欣賞厥个色目、厥个靚咧！天合地同你共樣停在該，哦！分人呆去毋記得愛啟氣哦！

秋天，這涼爽个天時，在臺灣還分日頭苦毒核，十外點鐘過後，斯分人齧牙齒、縮頸根咧，十度左右个溫度，差恁多，還寒哦！斯像洗「三溫暖」个樣，坐共枋飛行機个人，逐個都乖乖搵出羽毛衫，斯驚旨寮著先寒著哦。計程車貴都驚死人，坐過一擺斯喊毋敢咧，過後个幾日，還係認真兜做功課，坐地鐵、公車當然有較贏。英國，這大量度國家，各色人種混雜戴共下，街路項玄玄風還會分你聽著幾半句華語。幹頭一看，係同你共樣个黃皮膚人，有他鄉遇故人个歡喜，「你對哪來个？」有大陸，有香港，也有新加坡同臺灣，搭兩句，大家親暱暱。

跔緊風，隨核落葉个腳步，悠悠行在油光油光个石頭磚路面，偲个腳跡重疊在幾百年來路人个印記上背，有行入歷史个感動，斯像打探老人家打摺个面皮共樣，毋使問年紀，歲數个蹤跡既經傳達分你知咧！淨俐、撈腹个石頭路面帶核你遊公園，看古蹟。倫敦這大城市，鬧熱同恬靜斯戴兩隔壁，闊闊个大公園，園在鬧熱街路脣，正邊撇街路、轉一個幹，斯入到大公園肚咧。屬於皇族个公園有幾下座，圖畫中靚形个大樹，一頭比一頭大，管顧一片青天。剃過頭个大草坪，靚靚守顧偲人个土地，寒風捲起來个落葉，帶有詩人个浪漫，英國人个氣質，係毋係斯對這來个？

博物館也有幾下座，盡愛邊个係大英博物館，有兩日个時間偲貼貼浸在該，毋單淨感動，對文化个尊崇斯像電打電个樣，一到過一到，直直連到內肚盡深个所在。莫論厥東西對哪來，單淨厥等對文化古物保存个用心，斯使得用「偉大」來形容。逐個館个文物各有特色，乜做下當錫人，愛慢慢透底欣賞過，實在無恁該！

寮一擺轉來，歡喜中還係有當多个遺憾，逐日早早出門，到日頭同星光交班時節轉民宿，一個國家愛看真真、行透透，正經難哦！

作者：劉玉蕉

☆詞彙學習☆

【腦膈肚】no^ˋ gag^ˋ du^ˋ：腦海中。

【箍在】kieu⁺ coi⁺：圍在。

【毋打眼】m^ˇ da^ˋ ngien^ˋ：不起眼。

【呆】ngoi^ˇ：本文指出神的樣子。

【大量度】tai^ˋ liong^ˋ tu^ˋ：指包容性大。

【親暱暱】cin⁺ nag^ˋ nag^ˋ：很親暱。

【靚形】ziang⁺ hin^ˋ：形狀漂亮。

【管顧】guan^ˋ gu^ˋ：守護。

【透底】teu^ˋ de^ˋ：從頭到尾。